



ANG

PAGHIMAKAS

REGULAR NGA ISYU

ABRIL-HUNYO, 2004

Editorial:

Rebolusyon sabat sa nagalala nga krisis matapos ang madinayaon nga eleksyon 2004



Natapos ang reaksyonaryo nga eleksyon kag liwat nga naluklok sa poder sa isla sang Negros ang mga dalagku nga burukrata kap-agalon mayduta. Liwat napamatud-an sang Partido Komunista sang Pilipinas nga torneo lamang ini sang mga nagahari nga sahi para ayuson ang ila bangigay sa pagkihad sang poder. Nalansang bilang mga piyon ang masa kag pwersado nga magpili sang masunod nga magpigos sa ila.

bilang base sa pagbalik liwat sa poder paagi sa malaparan nga vote-buying, terorismo-militar kag sistematiko nga pagdinaya paagi sa COMELEC kag mga alyado nga mga politiko, asyendero kag iban pa.

Sin-o ang natangban? Matingkad ang biak nga gintuga sang pagbugras ni Maraño kag mga kaalyado sa rehimeng Macapagal-Arroyo. Ginbuyagyag ni Maraño ang iya mga pagpamatuk sa mga padanlog sa iya ni GMA gamit ang pondo sang gobyerno para lamang makuha ang iya suporta sa eleksyon. Partikular nga gintumod niya ang P5 milyones nga agrikultural nga pondo para kuno sa "abono".

Ang malain pa kay ini ipaagi sa isa ka misteryoso nga *non-government organization* (NGO). Sa pihak nga napabilin sa poder matapos sang eleksyon upod

Mga Kaundan sa Sini nga Isyu

- ✦ Kober / Editoryal
- ✦ Opensiba sa Canlaon
- ✦ Baryo Rebo
- ✦ RSOT Napaslaw Liwat
- ✦ NPA Nagtib-ong sang CARHRIHL sa Reyd sa Mahalang Detachment
- ✦ Inaway sa Tacpao
- ✦ Pinili nga Ranac

sang iya pila ka masaligan, karnal nga dagta naman siya sa grupong-Arroyo nga lubos ang kainit sa iya nga "benertuldo" kag "buno-sa-likod" nga pagkambyo sang kampo.

Sin-o ang lubos nga dehado? Wala sang naangkon o maagum nga kaayuhan ang pumuluyo sa nasambit nga eleksyon kag pagkatapos sini. Nagpanghakroy ang malapad nga masa, pila pa lang ka adlaw matapos ang pinili-ay sang magsalaka ang bili sang balaklon. Ginpalala pa ini sang serye nga pagbutyog sang presyo sang langis. Nagsaka ang matrikula, pletehan, bulong, kuryente, tubig kag iban pa. Wala sang nagakaigo nga umento sa sweldo ang mga mamumugon. Ginpalala pa ang sitwasyon sang madamuan nga retrenchments. Padausdos man ang pangabuhian sang mangunguma dulot sang pagmahal sa gasto sa produksyon samtang barato ang bili sang ila produkto. Lapnagon ang landgrabbing para sa pagsulod

PANAWAGAN

Sa pagpauswag sang aton *PAGHIMAKAS*, ginapangabay sa tanan nga bumalasa sini nga mag-amot sang mga balita, piktyur, istorya kag iban pa nga sinulat. Ginapadangat man nga ang mga amot-sinulat mapadala isa ka bulan antes sang Marso, Hunyo, Septyembre, Desyembre sang kada kwarter. Nagapangayo man kami sang inyo mga suhestyon kag komentaryo paano pa gid ini pauswagon.

Ginapangabay man nga hatagan tum-ok sang talakayon nga kaundan ang tuhoy sa mga sinulat nga nagapaathag sa aton mga sandigan nga prinsipyo, mga kadalag-an sa nagkalain-lain nga patag sang rebolusyonaryo nga hilikuton, subong man ang paghublas sang mga pakuno-kuno sang reaksyunaryong gobyerno kag pasistang kaaway.

Mahimo nga ma-download ang mga isyu sang *PAGHIMAKAS* sa internet. Magkadto lang sa website sang NDF sa www.philippinerevolution.org. Email address: angpaghimakas@yahoo.com

sang mga maki-dumuluong nga proyekto sang reaksyunaryo nga gobyerno kag agalon may duta. Nagahuyango man ang nahanungang saray ilabi na ang *low income professionals* bunga sang manubo kag wala kapat-uran nga kita. Upod sa iban nga sektor, ang trabaho sa iban nga pungsod ang ginala-aw-la-aw nga ultimo nga solusyon. Upod sa pagreposisyon sa poder sang grupong Arroyo, amo ang paggamit sang AFP kag PNP bilang mayor nga batano. Ang mersenaryong RPA nga mabaskog nga nagsuporta kay

Feature :

GMA kag Iggy gingamit man bilang *goons*. Indi mapahamtang ang grupong Marañon sang ginabalasa sang *national* kag *regional commands* sang AFP kag PNP ang mga kumanders sa Negros nga wala sang nagakaigo nga konsultasyon sa gobernador. Si Brig. Gen. Sodusta sang 303rd Brd PA, Chief Superintendent Belarma Regl Police Office kag iban pa nga ginpwesto nga upisyal nga klaro nga malapit sa kampong Arroyo kag halos didto na nagareport sa 5th district. Nagakorte man ang pagbalik liwat sa poder sang grupong Gatuslao sa sur kag Coscolluela sa sentral kag northern Negros bilang politikal nga payola sa pagpadaug sa grupong Arroyo.

Nanyutralisa si Eduardo Cojuangco matapos sang pagpanghilabot sang gobyernong- Arroyo sa iya intereses sa San Miguel Corporation. Naipit ini sa mas mabaskog nga impluwensya kag kontrol sang grupong GMA sa mga *local* kag *foreign banking* kag *financial institutions* nga direkta nagapakigsosyo sa SMC. Gin-sona libre sini ang *political turf* sa Negros kag wala na nagpaggwa sang daku nga pondo sa eleksyon sa iya mga alagad nga nagsaylo sa kampo ni FPJ sa kahadlok nga mabalikan sang grupong GMA.

Ang pagtalum sang kiskisanay sa tunga sang grupong Marañon kag Arroyo para sa ila makasahi nga interes magadulot lamang sang paglala sang nagahuyango na nga ekonomiya sang Negros. Apang ang ila nga paghili-usa indi man gihapon makapaayo. Padayon ang pagsarorot sang presyo sang kalamay. Dagmak kag nagakombolsyon na sa sakit ang mala-kolonyal kag mala-pyudal nga sistema kag ang solo nga kaluwasan sang pumuluyo amo ang Pungsodnon Demokratikong Rebolusyon. Bagay nga gina-ekspektar gid sang grupong Arroyo kag nagmando na sang pagdugang sang tropang militar kag pagpasingki sang militarisasyon sa Negros para mapunggan ang pagbaskog sang rebolusyonaryong kahublagan.

Ara sa kalig-on kag kabaskugon sang Rebolusyonaryo nga kahublagan sa pagpamuno sang Partido Komunista sang Pilipinas ang pagpanday sang bag-o nga buwas damlag sang pumuluyong Negrosanon. Sa madamo nga mga sonang gerilya sini, naka-benepisyo na ang malapad nga pumuluyo sang mga kadalag-an sa mga nalunsar nga kontra-pyudal nga paghimakas kag mga proyekto sang rebolusyonaryong gobyerno. Sa paglala sang krisis kag pagbaskog sang NPA, ang masang pumuluyo sa Negros nag-angkon sang daku nga kumpyansa kag pagsalig nga ang armado nga paghimakas lamang ang banas para sa lubos nga kahilwayan sang sahing pigos.

Napakapaborable sang sitwasyon para sa pagpasingki sang rebolusyon!

Opensiba sa Kanlaon City

"Ang kilat wala naga-igo sa isa lamang ka lugar sa makaduha ka beses" Ini ang pagpati sang kadam-an. Apang sa Kanlaon City ang kilat permi naga-tira--gulpyada kag may presisyon.


Kaangay sang kilat sa "ugtong adlaw" ang mga opensiba sang NPA batuk sa mga pinili nga target nga kaaway sa Kanlaon City. Wala sang presensya sang gal-um o pagguom-guom kag ang daguob nagangurob sa husto nga tinion.

Ginakabig sang 303rd Brigade PA kag PNP nga yabe ang erya sang Kanlaon sa ila *counter-insurgency* (COIN) *operations*. Gindugangan kag ginpatig-a nila ang mga detatsment kag halos sige-sige ang ila mga *combat operations*. Apang daw mga bulag kag bungol lamang ini sa pagpangita sa mga katapu sang NPA. Naga-ikog na lamang sila matapos sang taga ka madinalag-on nga opensiba sang NPA kag ang mga inosente nga masa ang ila ginabalikan.

Sa pihak sang daku nga konsentrasyon-militar nangin madinalag-on ang ambus sang NPA batuk sa grupo sang berdugo kag anay Mayor Jose "Ondo" Cardenas sang Abril 27, 2001 kag ang ambus sang Agosto 6, 2003 sa grupo ni Lt. Regner sa haywey sang Brgy. Linothangan.

Matapos sang ikaduha nga ambus sang NPA nga nag-utas sa kabuhi sg pinaka-ali-ali nga *counter-insurgency operator* sg 11th IB PA nga si Lt. Regner, ginsaylo ang isa ka army detatsment malapit sa site sang ambus kag ginpadamuan sg soldado. Ginpasangkad ang ila mga BIN (Brgy. Intelligence Network) ilabi na sa ginasuspetsahan "Pula" nga mga baryo.

Liwat nga Pagkilat sa kagab-ihon nga may eklipse....



Indi malayo sa ambus sayt, makita ang Tollgate sang Pamilya Perez sa Brgy. Masulog, Kanlaon City nga

ginhimo *Police Outpost* sang PNP/PMG (Prov'l Mobile Group) sa Kanlaon City. Tuman ka kontrobersyal ang ining pribado nga Tollgate sang mga Perez bangud nagapanukot sg P50-100 sa kada salakyan nga naga-agi. Nagserbe diri nga *private security guards* ang mga katapu sg PNP/PMG. Gina-tolar ang ining extorsyon nga aktibidades sang lokal nga gobyerno sang Kanlaon City.

Madamo na sang pumuluyo ang nagareklamo sa sining iligal nga ekstorsyon sa dalanon. Wala labot sang mga elemento sang PNP/PMG bilang *private guards* ginagamit man ang mga katapu sang "Kanlaon warriors", isa ka armadong private army sang Cardenas-Blanco nga malapit sa isa ka paksyon sang pamilyang Perez nga naga-operar sang Tollgate.

Bastante sa kita kada-adlaw, nangin regular na ang pag-inom kag pagpahubog sang mga nadetalye nga mga katapu sang PNP/RMG sa sulod sang Tollgate/Outpost samtang ang daku nga bahin sang ekstorsyon ginabulsa sang grupong Perez kag may bahin man ang grupong Cardenas-Blanco.

Gindesisyunan sang Leonardo Panaligan Command sang NPA-Larangan Gerilya (LG)-1 nga tigayunon ang isa ka opensibang

aksyon batuk sa nasambit nga Tollgate nga ginakainitan sang pumuluyo.

"Nagakabagay lamang nga tagaan leksyon o mauntat na ining klase sang ekstorsyon."

Ang masunod amo ang detalyado nga mga panaysayon sang mga Pulang operatiba, ang Kilat sang Kanlaon.

"Antes ang pagreyd, maid-id namon nga ginsunod ang aktibidades sang ara sa *Outpost*. May panahon nga nagapaligo sila sa malapit nga sapa bilin ang ila mga HPRs (High Powered Rifle) sa *Outpost*. May panahon man nga isa lang ang nabilin sa sulod sang *Outpost* kay ang iban nagalagaw bilin ang ila HPRs. Pero ang pinakamaayo gid nila nga ginahimo amo ang mag-inom kada gab-l kag kun mahubog na, ipasandig lang ang ila mga armas sa isa ka lugar kag dayon tinulog. Nagahinuragok pa gani sila. Serbe nga ila na lang bantay amo ang 7 ka bilog mga ido nga kun palapitan sang tawo, dayon man palagyo."

"Ang *Outpost* ila ginhimuan sang barikada kag may mga sandbag nga ginhimo trensera sa palibot sang *Outpost*. Duha ka Kilometro halin dira, nahamtang man ang Detachment sang 11th IB "B" sa So. Tukon-tukon, Brgy. Linothangan nga ginbutang dira matapos ang ambush sang Agosto 6, 2003."

"Base sa sini nga mga inpormasyon kag mga detalye, ginplanuhan ang isa ka military-action base sa ikasarang sang yunit sang Hukbo. Ginhim-os

ang plano sang inaway, mga taktika kag teknika. Tapos, larga na sa misyon ang isa ka tim nga amo ang magtigayon sang amo nga T.O."

Mayo 3, 2004

"Aga pa, amon liwat gin-obserbahan ang hulag sang ara sa *Outpost*. Gintantya namon kun bala masarangan na nga iduso ang aksyon o indi pa. Bangud sang limitasyon sa pila ka bagay, wala anay gintigayon kag naghulat sang dugang nga pwersa nga mag-suporta."

Mayo 4, 2004

"Kaagahon padayon ang pag-obserba sa target. Pagkahapon ginbalikan kag ginbantayan na gid ang hulag sang PNP/PMG sa Outpost samtang alerto man sa hulag sang malapit nga Detachment. Bangud daw linong man kag padayon sa ila aktibidades nga inom pagkatapos panyapon ang mga target, wala na namon ini ginhalinan. Pag-abot alas 11 sa gab-I, gin- agyan- agyan ang amo nga *Outpost* agud seguruhon nga tulog na ang mga target."

May 5, 2004

12:45 A.M.

"Mahinalungon apang pat-ud ang mga tikang, nasulod namon ang barikada sang *Outpost* nga wala namutikan. Pagkakita sang mga ido sa amon, dayon nila dinalagan nga wala man gani nakataghol. Dayon kami sulod sa pwertahan sang *Outpost*. Didto nagatinulog kag nagahinuragok pa ang 4 ka PNP/PMG kag 5 ka sibilyan nga ila salaligan."

"Indi maghulag.....!!! Armas lang tuyo namon! Mga NPA ni", singgit pagpakilala sang Tim Lider. " Baking, gapusa sila kag seguruha

nga wala sang makapalagyo. Abe, kuhaa ang armas!"

"Sir, indi lang ko paggapusa ay! Bag-o lang ko nahilot." Pagpakitluoy sang isa ka PNP.

"Indi! gapusa sila tanan. Pahalugi lang ang sa bag-o nahilot." Liwat nga mando sang Tim Lider.

"Ka, ari na ang ila mga armas.", siling sang kaupod nga nagkuha sang mga HPRs.

" Kapkapi sila kag seguruhon nga wala sang nabilin nga armas pati celfons!" mando liwat.

" Ari na Ka ang ila mga .45 kag celfons." Sabat sang kaupod.

" Abe, unahi na sa gwa. Baking, sunod. Seguruha ang aton *blocking!*" katapusan nga mando sang Tim Lider, dayon gwa sa Outpost.

Nabilin ang mga PNP/PMG kag ila mga salaligan nga nakagapos. Wala

sila naka-agum bisan pitik man lang.

12:51 A.M.

"Bangud masanag ang bulan sa sina nga panahon, madasig kami nga nagpadulong

sa amon *Rallying Point*."

"Apang pag-abot sang pasado alas 3 sang aga, amat-amat na ang eklipse sang bulan. Medyo dulom na kag may limitasyon ang mga kaupod sa

lugar, nagpahuway na lang kami sa isa ka gamay nga lati. Didto naghulat kami sang pag-abot liwat sang kagab-ihon para magpadulong na sa natalana nga *Rallying Point* upod sa iban nga mga kaupod."

Ang nagadaguob nga resulta sang kadalag-an:

Sa kabilugan, natigayon ang reyd sa sulod lang sang 5 ka minutos. Nakakuha sang 3 ka M16, 1 M14, 3 ka .45 caliber pistol, mga bala sang M16 kag M14 kag magasin sang .45 kag mga bala kag may 2 ka *Cellphones*, *combat shoes* kag *camouflage uniforms*.

Pila sa mga leksyon nga naani amo ang pat-ud nga mga impormasyon kag datos nga naghalin sa *direct intel operatives*, sa masa kag sa kaaway mismo. Gingamit ang husto nga pleksibilidad kag may taas nga elemento sang sorpresa. Matumod man ang husto nga timing bangud pag-abot sang Mayo 5, 2004, nagbulos na ang 11th IB PA para sa pagkonduktar sang COMELEC Tsekpoin sa amo nga *Outpost*. Apang labaw sa tanan ang malapad nga suporta sang masa kag ang husto nga disposisyon sang tropa nga magtigayon sang aksyon.

**Pila sa mga leksyon
nga naani amo ang
pat-ud nga mga
impormasyon kag
datos nga naghalin
sa direct intel**

Brektru: Pagtukod kag Pagpabaskog sang Baseng Masa

Ang istorya sang Baryo Rebo

Makasaysayan ang rebolusyonaryo kahublagan masa sa Larangan Gerilya 1. Sa isa ka eksklusibo nga interbyu nakuha sang AP sa pila ka responsableng kadre sa nasambit nga larangan ang pila ka malahalang nga mga leksyon angot sa pagpundar, pagpabaskog kag pagpabwelo sang organisasyon masa sa isa ka baryo sakop sang larangan.

Ang Baryo Rebo sadto.....



nga lubos nga naangkon ini. Masobra 300 ka pamilya ang sa idalum sang saop sg naghugakom nga agalon upod na ang pamilyang gin-agawan sg duta. Tersya-parte ang pagbahinay sang produkto sang duta.

Tuman ka pigado ang pagpangabuhi sang masa sa nasambit nga baryo bangud sang kaatrasado sang kagamitan sa produksyon kag kondisyon sang duta. Mabulubungyod ang erya kag gamay lamang nga parte ang mapatag. Mais kag kararuton lamang ang masami nga matanum sg masa. Nagasagod man sila sang kasapatan kaangay sang baboy, manok, kanding, baka kag karabaw para makuhaan sang cash nila nga kinahanglanon. Malaka ang utanon. Uga, asin kag ginamos ang kinaandan nga sud-an. Atrasado man ang pagpangabuhi sang masa nga gina-manipestar sang indi maayo nga pagpanguma, sanitasyon kag pangginawi.

Tuig 1984, nalambot ang erya sang Armadong Yunit Pampropaganda (AYP) kag regular nga Pulang hukbo. Nangin tungtungan ang isyu sang pagpang-agaw sang duta kag manubo nga bahinay para maorganisa ang malapad nga masa sa baryo. Apang indi nangin matingkad ang pagsulong sang kontra-pyudal nga paghimakas bisan pa may napundar na nga organisasyon masa.

Gintukod sang 1987-88 ang Lubos nga Asosasyon Masa (LAM) sa baryo apang tuman ini ka buhaghag kag wala maka-pangsyunar sang maayo. Ginbendisyunan pa ini sang isa ka engkwentro batuk sa militar sa adlaw sang iya asembliya bangud na-ekspos sa isa ka indi

Tawgon na lamang naton nga **Baryo Rebo** ang nasambit nga lugar. Masobra 1000 ka ektarya sang duta ang gin-angkon lamang sang isa ka agalon-may-duta paagi sa *landgrabbing*. Tuso nga gingamit sang agalon ang layi kag pagpasaka sang mga kaso batuk sa nauna nga pamilya nga nagaposisyon sa duta tubtub

masaligan nga elemento dulot sang tuman nga gahud kag *chanting* nga natuga sang asembliya.

Matapos sang insidente, wala na masubaybayan ang LAM. Nangin praktis man sang NPA ang "pugad-pugad" nga sistema sa diin nagatulog na lamang sa mga balay sang masa. Bangud sang halog nga seguridad masunson nagakareydan sa mga balay kag mga tagbuan. Nangin masami ang mga engkwentro bangud sang pagpalayag sang NPA sa baryo. Sa pihak sang mga masami nga mga operasyon militar, wala gid nagbakwet ang masa. Temporaryo lamang sila nga nagsaylo sa malapit nga mga sityo kag magbalik. Nagpasaka sang kaso ang isa ka pamilya sa ubay sang mga kaupod batuk sa militar nga nagkompiska sang ila mga kasapatan sa isa ka operasyon kag ini nagdaug. Namalayran ang mga pasistang tropa.

Wala man gin-abandonar sang NPA ang nasambit nga baryo sa pihak sang masingki nga militarisasyon. Apang nagatiyog-tiyog na lamang ini nga wala sang klaro nga trabaho sandig sa pagtukod sang baseng masa, agraryong rebolusyon kag armado nga paghimakas.

Nangin makasaysayan ang Baryo Rebo sa panahon sang ika-2 nga Dunganon nga Kampanyang Panadlong. Isa ini sa tatlo ka baryo nga nagsapopo kag nagsuporta sa Partido kag NPA sa pinaka-ital-ital nga porsyon sang panahon sang panadlong. Sa pihak sang "Operation Flush Out" sang kaaway sang 1994-95, napreserba ang nanadlong nga Partido kag NPA paagi sa pagpalubong sa mga lati samtang gina-aratay sang lupot kag tipos. Wala pa sang may nagaluntad nga organisasyon masa masa sa nasambit nga panahon.

Sang pormal na nga ginkasa ang unang halintang sang panadlong sang 1994, ginpatawag ang inisyal nga mga kontak kag anay mga lider-masa. Gintigayon ang pagsaway sang kaugalingon sang Partido kag NPA, pagtuon sang mga dokumento sang rektipikasyon kag pagkuha sang mga opinyon sang masa bahin sa ila pagbaton sang NPA kag pagtukod liwat sang ila organisasyon masa. Positibo ang ila nangin sabat.

Sa sini nga panahon, may 33 ka sityos na ang Baryo kag may masobra 1000 ka bubong nga sakop. Una nga ginhimo, ang pagayos gilayon sang SICA sa Baryo kag sa mga sityo nga ginahulagan. Madasig nga napundar ang una nga GPs (Grupo Pang-organisa) sa mga sityos. Apang bangud sang nagaluntad nga sitwasyon nga agresibo katama ang kaaway nga tapuson ang inaway, temporaryo ang mga ini ginbayaan para sa madasig nga pagkurit kag pagpalapad para makaggwa sa konstriksyon sang kaaway.

May temprano man nga pag-ekspos sa numero sang nanadlong nga tropa sang Partido kag Hukbo. Paktor ini sang pagpangibabaw sang konserbatismo nga pungan anay ang kontra-pyudal nga paghimakas sang mangunguma. Sa sini nga panahon dala-dala pa sang mga kaupod ang kosepto sang daan nga praktis sa pagkihad sang CB (Chartered Barangays) sa mga rebolusyonaryong baryo nga ginabug-os lang sang 50 ka bubong. Ulihi nga bahin sang 1994, natukod ang KP (Komite Pang-organisa) sa lugar sa kundisyon nga may 7 na ka GP nga

nagatindog kag pipila ka naga-abanse nga aktibista. Talaksan sa pagpatapu sa KP amo ang pinakamasaligan, masigasig sa hilikuton, respetado kag sandigan ang sahi kag maayo nga rekord bilang mga anay lider masa sadto


Ang Kontra-Pyudal nga Paghimakas Bilang Yabe sa Hilikuton Masa sa Kaumhan

Tuig 1995, nagtinguha nga bawion sang agalon ang mga duta sang mangunguma. Plano sini nga itransporma sa asyenda ka pastuhan Sa likod sini amo ang plano sa pagmina sang isa ka Burukrata Kapitalista. Sa una nga kwarto sang sini nga tuig, ginlunsar santo sa kapasidad sang organisasyon masa ang kontra-pyudal nga paghimakas para depensahan ang pangabuhian batuk sa *landgrabbing*.

Gin-atubang sang masobra 300 ka mangunguma ang agalon sa una nga dayalogo kag naggiit sila nga maghatag lang gihapon sang tersya parte o magbayad sang P25 sa kada gantang sang mais nga ila mabinhi. Wala nagpasugot ang agalon. Sa ikaduha nga dayalogo-komprontasyon, natukiban sang masa nga 5 lamang gali ka ektarya ang titulado sang agalon. Napikon, nagpadala ini sang mga surbeyor para takson ang ginaangkon nga duta. Ginbantayan sang masa ang pag-surbey para indi madala ang ila ginapusiyanan nga duta.

Nabutang sa depensiba ang agalon kag kaangay sa mga una niya nga mga mahigko nga taktika sa pagpang-agaw sang duta, ginpasakaan niya sang panumbungon ang 16 ka mangunguma sa kaso kuno nga harasment sang mga surbeyors. Wala man nag-atubang sa korte ang mga akusado. Nagpanago ang mga ini kag wala maserbe ang warant. May higayon man nga ginpatawag ang mga mangunguma sang agalon sa detatsment sg militar apang wala sila nagkadto/

1996, may gintigayon nga *Fact Finding Mission* sa nasambit nga lugar ang mga nahanungang pwersa gikan sa urban. Ginsabat ini sang agalon sa pagpadala sang militar. Inatubang sang mga kababaenhan kag kabataan ang mga pasista kag gingiit ang ila kinamatarung sa duta. Wala na mahimo pa ang agalon kundi temporaryo nga bayaan ang lugar sa daku nga kalipay sang masa bangud tubtub subong wala na sila naghahatag sang ila parte.



Ang kadalag-an sang paghimakas masa sang Baryo Rebo naka-impluwensya man sa iban nga baryo sa pagpasaka sang ila bahin kag pagtukod sang ila organisasyon masa. Sang tuig 1997, natukod ang una nga Sanga sang Partido sa Lokalidad (SPL). Tatak sang matambok nga inagihan sa makasahi nga paghimakas kag konsolidadong kusog.

Ginkonsentrahan sang mga kadre sang Partido ang pagbatiti sang panugod nga pagbwelo sang SPL. Diri pa man ginahiwat ang mga aktibidades pangkonsolida sang Partido kag Hukbo. Ginkasa ang pagtuon sang mga kurso sang PADEPA (Pambansang Demokratikong Paaralan) sa madamo nga mga katapuan.

Agosto, 1999 isa ka *military operation* ang ginlunsar sang 303rd Brigade PA nga nagresulta sa masandukot nga inaway sa naka-kampo nga yunit sang NPA. Ginsa-praktika sang organisadong masa ang rebolusyonaryong inisyatiba sa pagbulig sa mga kaupod paagi sa pagkaon, seguridad kag paglansi sa kaaway. Nangin bulag kag bungol ang kaaway sa "misteryoso" nga pagkadula sang NPA.

Nangin masunson ang mga FFM batuk Pasismo. Inatubang sang masa sang Baryo Rebo kag kaiping sini ang sunod-sunod nga mga *military operations*.

May panahon nga nakadistansya ang responsableng yunit sang Partido kag Hukbo kag nahalugan ang pag-ubay sa mga nagapamuno sa Baryo Rebo bagay nga nadugayan ang pag-angat sa lebel sang LAM. Nakita ini nga problema kag gilayon nga ginbalikan sang 2000 paagi sa SLT (Semi-Legal Team) nga paghulag, ginhatagan sang kongkreto nga ubay sa pagpamuno, pagpahulag sa masa sa kontra-pyudal nga paghimakas, sa pagsolbar sa problema sang m


kag sa iban pa nga palaligban sang masa. Ginbunga sini ang pagbuylo liwat nga inisyatiba kag pagpamuno sang SPL. Nakasa ang nagkalain-lain nga porma sang paghimakas masa kontra pasismo bisan wala ang presensya sang mga kaupod. Ginpamatukan ang pagtukod sang detatsment, pagrekrut sang CAFGU kag iban pa nga plano sang militar.

2002. Nagsulod ang RSOT (Reengineered Special Operations Team) sang militar sa Baryo Rebo. Pilit nga ginpresentar sang mga pasista ang kaugalingon bilang manugsensus kag mabulig kuno sa problema sang masa. Sa dayalogo, ang ugat amo

gintigayon nga ginpresentar sang masa sang ila problema nga ang duta kag perwisyo nga tuga sang militarisasyon sa kaumahan ilabi na ang presensya sang RSOT. Gingiit man nila ang ila ligal nga kinamatarung bilang pumuluyo kag pagtukod sang ila organisasyon. Sa una nga kwarto sang 2003, nag-pull-out ang napaslawan nga RSOT.

Sa basehan sang tayuyon nga pagbuylo sang organisasyon masa kag SPL, halos 75% na sang populasyon sang pwede maorganisa ang nalab-ot, may YM (Yunit Milisya) kag SDC (Self Defense Core) na. Nakapanglimpyo na sang pipila nga KRME (Kontra-Rebolusyonaryo Malain nga Elemento). Gintukod ang LAM sang PKM (Pambansang Katipunan ng mga Magsasaka) sa Baryo Rebo sang 2003.

Masobra 100 ang nagtambong sa asembleya sang LAM-PKM. Ginsunod diri ang pagtukod sang LAM sang MAKIBAKA (Malayang Kilusan ng Bagong Kababaihan) kag KM (Kabataang Makabayan). Aktibo ang YM kag SDC sa erya kag naga-upod na sa mga punitibong aksyon kag taktikal nga opensiba (TO).



Sa subong nagabuylo sa Baryo Rebo ang kultural nga paghanas kag kampanya sa ikaayong lawas. Nakaduso man ang organisasyon masa diri sang serbisyo sosyal sa porma sang pagdemanda sang tubig nga ilimnan sa Barangay. Ang mga kabataan nag-aksyon man sa paghingyo sang bulong nga gilayon ginhatag sang Opisyal sg Barangay.

Tuburan para sa rekrutment sang Pulang Hukbo ang Baryo Rebo. Muklat ang SPL sa iya katungdanan sa rekrutment sa Partido kag Hukbo. Regular man ini nga nagasuporta sang pinansya, pagkaon kag tawo para sa nagkalain-lain nga trabaho sang rebolusyonaryong kahublagan. Matambok man ang eksperyensya sang SPL sa nagahiliugyon nga prente kag alyansa. May impluwensya ini sa Konseho sg Barangay kag pila ka institusyon kag ahensya sang gobyerno nga nagaluntad sa baryo. Sa mga problema sa barangay masami ang SPL ang ginakadtuan para maghusay. Tatak ini sang pagkilala sang superyoridad sang rebolusyonaryong gobyerno sa tanan nga aspeto sang pagpangabuhì sang pumuluyo sa barangay.

Sa kampanyang-masa batuk sa RSOT, yabe ang pagdikit sang SPL sa mga mahuyang nga elemento sa baryo para ipatapu sa organisasyon masa. Bangud sini, wala sang bisan isa nga narekrut para sa CAFGU.

Sa pagluntad sang rebolusyonaryong gobyerno sa baryo, ginatigayon kag nagalarga na ang pagpamuwis. Ginakabig ini sang pumuluyo sa Baryo Rebo nga importante nga bahin para makatipon sang pondo para sa rebolusyonaryong produksyon, edukasyon, ikaayong-lawas kag

sanitasyon, depensa, kultural kag literasiya kag iban pa nga serbisyo sosyal. Ang mga saop sang iban nga agalon nakapataas man sang ila nga bahin halin sa tersya parte padulong sa quarta parte.

Ang Baryo Rebo sa Karon

Tuman na kalayo ang naabot sang lebel sang politika, ekonomiya, kultural kag medikal sang Baryo Rebo kun ikumpara sa panahon nga wala pa mag-abot ang rebolusyonaryong kahublagan.

Mauswagon na ang produksyon nga nagatib-ong sang kolektibo nga pagbinuligay sang masang mangunguma, NPA kag Partido. Makita ini sa pagpalapad sang mga talamnan, paghimo sang irigasyon kag madamuan nga pagtanum sang saging kag mga utanon. Nagtin-ad kag nag-uswag man ang pagsagod sang mga kasapatan.

Mataas ang literasiya diri kun ikumparar sa iban nga baryo. Nangin isa na ka kampanyang masa ang sanitasyon kag ikaayong lawas nga nagresulta sa pagtinlo sang palibot kag paglikaw sa mga masakit kag epidemya.

Nagapabilin nga mataas ang rebolusyonaryong militansya sang organisasyong masa. Padayon sini nga ginapaslaw ang mga padugi sang agalon sa kolaborasyon sang reaksyonaryong gobyerno paagi sa DAR nga bawion ang dutang pangabuhian. Ila man ginapaslaw ang maniobra sang Mosser Environment Corp. nga magsulod sa erya para magtanum sang komersyal nga kahoy nga magaresulta sa panibag-o na naman nga kaso sang *landgrabbing*. Ang pagbalik sang RSOT sining 2004 sa tuyo nga wasakon ang organisasyon masa

lubos nga ginapamatukan sang pumuluyo sa pihak sang pasingki nga mga pagpamahug, *black propaganda* kag surbeylans sang mga pasista.

Padayon nga nagabusawak ang tuburan para sa rekrutment sang Pulang hangaway gikan sa Baryo Rebo. Nagamarka ang wala utod nga henerasyon sang mga rebolusyonaryong kadre sang Partido kag isganan nga hukbo. Mataas ang ispirito sang boluntarismo. Ginahanda ang rekisitos para sa pagtukod sang Komiteng Rebolusyonaryo sa Baryo (KRB).

Mga Malahalon nga leksyon:

Napamatud-an sa eksperyensya kag brektru sang Baryo Rebo nga yabe ang husto nga pagpamuno kag hugot nga ubay sang Partido sa tagsa ka mga kadalag-an sa patag sang politika, ekonomiya, militar, kultural kag medikal. Klaro ang katuyu-an kag plano sang tagsa ka aspeto sang mga rebolusyonaryo nga hilikuton nga may pat-ud nga target kag lalambutan. Bangud sini ang inisyatiba kag boluntarismo sang masa lubos nga nakaamot sa tagsa ka halintang sang pag-uswag kag paglig-on sang ila organisasyon masa, Partido kag Pulang Hukbo.

Malahalon man ang papel sa pagtuon sang rebolusyonaryong teorya. Ang mga katapuan kag pamunuan sang SPL nangin matutum nga tumuluon sang sandigan kag intermedyang kurso sang Partido. Esensyal ini nga instrumento sa pag-angot sang ila praktis kag teorya nga mapataas sa mas abanse pa gid nga teorya kag praktika.

Ang sustenido nga pagsulong sang paghimakas masa ilabi na sa kontra-pyudal kag kontra-pasista

nagsubo sa ila kapag-on kag kaisog. Naglapad ang ila nga rebolusyonaryong impluwensya kag nagkalso sang biak sang nagahari nga sahi pati na sa

militar sa lebel sang barangay, munisipal kag distrito.

Masanag ang mapula nga buwas damlag sang Baryo Rebo. Mangin

maduagon man sa tanan basta mangisog lang magrebolusyon kag magtindog nga mangin hilway.

RSOT Napaslawan Liwat



Bahin ini sa pinaka-ulihi nga pagpaslaw sa RSOT sang pumuluyo sa magkaiping nga mga barrio sakup sang isa ka Larangan Gerilya sa isla sang Negros.

"Ari kami diri para mahibaluan ang inyo nga problema kag magbulig..." ini ang mga matamis apang dalitan nga mga tinaga sang isa ka katapu sang RSOT sa isa ka dayalogo upod sa mga pumuluyo sang isa ka baryo nga ginasuspetsahan pugad sang NPA.

Apang ang dayalogo nangin monologo (maki-isa lang ka bahin) sang wala pagrespetar nga agawon tani sang isa ka katapu sang RSOT ang mikropono para igiit ang ila solusyon sa problema sang masa nga amo ang paghimo sang dalan kag kuryente. Una na nga ginplatar sang pumuluyo nga gutom, kawawad-on, *landgrabbing* kag kakulang sang gamit sa produksyon ang mayor nila nga problema kag indi pa ang pagkaayo sang dalan kag elektrisidad. Wala modo nga nagsigi na lang singgitan ang militar, rason nga nagpalauli ang mga tumalambong bangud wala man pulos ang ila pagkadto.

Sa pihak naman nga baryo, may dala ang RSOT nga manugpanodlo sa ginaalegar nagapakaon kuno sa NPA. Tuyo sang militar nga pahugon ang lokal nga lider-masa kag mga katapuan sang organisasyon kag magpang-rekrut sang CAFGU. Sa una, kinulbaan ang lider-masa kag plano kuntani magsaylo. Apang nangibabaw ang kaisog sang maghugpong ini upod sa mga katapuan kag inatubang ang mga militar. Wala sang bisan isa ka CAFGU nga narekrut.

May estilo man ang militar nga kuno mangsensus sa baryo. Apang sa baylo nga magkuha sang socio-ekonomiko nga kahimtangan sang lugar nangusisa ang mga ini kun sin-o ang mga katapuan sang Bayan Muna (BM). Ginapalapta sang militar nga mga NPA ang katapuan sang BM. Ginkonprontar sila sang pumuluyo angot sang ila makaduluda nga mga pamangkot/imbestigasyon kag mga pamahug. Gintudlo ang mga ini sa opisina probinsyal sang BM bilang sabat. Huyhoy ang abaga, nagtalikod lamang ang militar kag naglakat.

Pila lamang ini sang mga eksena sang mga kapalpakan sang RSOT para wasakon ang napundar nga organisasyon masa sang pumuluyo. Mapalpak man sa una, sulit-suliton nga himuon ini sang militar bangud klaro ang ila tinutuyo nga "pahubsan sang tubig para madakop o mapatay ang isda." Lubos ang ila nga pagpati nga kon mawasak ang baseng masa sang NPA, mapolbos man nila ini.

Natumod sang nagapamuno nga organo sang Partido kag Pulang Hukbo nga dapat palig-onon ang organisasyon masa sa lokalidad bilang yabi sa pagpaslaw sa *counter-insurgency operations*.

Natunod sang nagapamuno nga organo sang Partido kag Pulang Hukbo nga dapat palig-onon ang organisasyon masa sa lokalidad bilang yabi sa pagpaslaw sa *counter-insurgency operations*. Tuso permi ang militar sa pagtan-aw sang kahuyangan sang organisasyon masa bilang pamaagi niya sa pagsabwag sang intriga, pamahug, pagtunga, *black propaganda* kag pagpang-into sa masa.

Bilang paghanda sa pagpaslaw sang RSOT, ginhiusa sang mga kadre sang larangan ang partikular nga SPL, mga Komite sa Pag-organisa kag mga Grupo (KPs) sa Pag-organisa (GPs) sa obhetibo nga sitwasyon politika, ekonomiya kag militar. Sa bahin sang halambalanon-militar, gintun-an ang OPLAN sang kaaway ilabi na ang ila nga estratihiya kag taktika sa COIN nga operasyon. Partikular man nga gin-istudyohan ang kina-iyang, katuyuan kag kondukta sang paghulag sang RSOT.

Ginlarga ang kahublagan masa kontra-pyudal sa porma sang pataas bahin sang mangunguma, pataas presyo sang produkto, pauswag sang produksyon, pagdemanda serbisyo sosyal sa ahensya sang gobyerno kaangay sang konsumo, bulong, gamit sa produksyon kag iban pa. Yabe ini sa pagpaaktibo kag pagpahulag sa malapad nga masa

nga nakatungtong sa ila nagapanguna nga kinahanglanon. Bangud reaksyonaryo kag kontra-pumuluyo ang tinutuyo sang RSOT ginpakamalain nila ang aksyon-masa nga kuno padihot o sugo sang NPA.

Gintindugan sang pumuluyo ang ila lehitimo nga kinamatarung sa pagtukod kag pagpadalagan sang ila organisasyon-masa batuk sa mga pamahug kag mga "alegasyon" sang RSOT nga ini mga pronte sang CPP-NPA.

"Kon ang NPA may kinamatarung magtukod sang ila organisasyon kag amo man ang AFP, nga-a indi pwede magtukod sang kaugalingon nga organisasyon ang mangunguma kay kinamatarung man ini namon?" maisog nga pamangkot sang lider-masa sa natangban nga katapu sang RSOT.

Sa kataka kag kahuy-anan (kon may huya pa) wala na ini ginsabat sang RSOT kag wala na nagbalik-balik.

Sa pagkadula sang RSOT naghari ang kalinong kag kasadya sa mga baryo....

NPA matutom nga nagtib-ong sang CARHRIHL sa kondukta sang Reyd sa Mahalang Detatsment sang Feb. 15, 2004.

Masami wala sang ihibalo ang mga mataas nga upisyal sang AFP angot sa kaundan sang CARHRIHL (Comprehensive Agreement on the Respect of Human Rights and International Humanitarian Law) sa mga interbyu sa ila sang medya.



Ang CARHRIHL nadihon sang masobra tatlo ka tuig kag nag-agi sa masalimuot nga proseso sang negosasyon sa tunga sa NDFP kag GRP. Ginpirmahan ini sang magtimbang nga panel sang negosasyon para sa kalinong sadtong Marso 16, 1998 sa The Hague, The Netherlands. Ginpabakod ini ni Kaupod Mariano Orosa, tagapangulo sang Pungsudnon nga Konseho sang NDFP sadtong Abril 10, 1998 kag ni Presidente Joseph Estrada sang GRP sadtong Agosto 7, 1998.

Apang ining signipikante kag makasaysayan nga dokumento wala ginatib-ong sang militar. Sa pagkamatuod wala man gani nila ginatun-an gani wala gina-implementar.

Sa pihak nga bahin, ang katapu sang Partido, NPA kag mga organisasyon masa seryoso nga nagatuon sining importante nga kasugtanan kag nangin ubay na sa kondukta sang inaway.

(Ang AP sa interbyu sa isa ka responsableng kadre sang Bonifacio Pasakan Command- Larangan Gerilya 2, nakakuha sang mga malahalang nga datus angot sa pag-obsarbar sang NPA sang CARHRIHL sa aktwal nga kondukta sang reyde sa Mahalang Detatsment. Gindenunsyar sang nasambit nga kadre ang paglapas sang militar sang CARHRIHL matapos sang opensiba sang NPA. Ari ang mga natipon nga mga punto).

1. Ang mga nagsurender nga CAFGU nga si Totec Corinto, 51 kag si Eduardo Raya wala ginsakit sang NPA. Gintrrar sila sa tawhanon nga pag-asikaso base sa mga probisyon sang CARHRHIL. Wala sila ginsakit kag ginrespeto ang ila kahimatanagn bilang mga *hors d' combat* (wala na ikasarang magbato).

2. Si CAFGU Alfonso Galenggo nga tani magreinforce sa iya mga kaupdanang, nadakpan kag gingapos lang samtang sige pa ang lukpanay. Wala man siya ginbayaan na lang o ginsakit tubtub nga nag-*withdraw* na ang NPA.

3. Si PFC Mario Ortiz, wala man gintiro sang nagsinggit siya sa gwa sang kudal sang *detachment* nga "I-sustain ang away kay lapit na ang reimpors". Abi niya guro mga kaupdanang pa niya ang sa sulod sang *detachment*. Ginsiggitan na lang siya nga indi na magpalapit. Wala siya gintero bangud mitsa man lang ang iya dala kag indi pusil.

4. Si CAFGU Raya nga nabihag sang NPA, gintagaan sang iya mga kinamatarung sandig sa CARHRIHL.

5. Sa pag-atake sa Mahalang *Detachment*, ang NPA nagtib-ong sang mataas nga disiplinang, hugot nag-uyat sang mga nadihon nga polisya pang operasyong, pagsulundang sang Hukbo sa pagtratar sang mga bihang kag sa mga probisyon sa CARHRIHL sa kondukta sa gyera.

6. Samtang ang Phil. Army, ilabi na ang 61st IB madamo sang mga bayolasyong paagi sa pagdetenir sa 2 ka kaupod nga napatay. Halos indi nila pag-irelease ang mga bangkay sa mga makuha nga pamilya. Ano pa ang gusto nila lab-utong kay patay na ang 2 ka kaupod?

7. Mga bayolasyong man ang pagsige nila pangita para dakpon ang mga pilasong nga NPA. Kahibalo sila nga may mga pilasong kag ang mga pilasong indi na makabato kag kinahanglang nga ipabulong. Ang mga pilasong indi na makabato kag indi na dapat lagson suno sa probisyon sang CARHRIHL kag Geneva Conventions apang wala nagapati ang Phil Army bahin diri kag muklat nila nga ginalapas. Gintukod nila ang mga tsekpont sa mga dalanong kag ginatsekyar ang tanang nga nagaagi. Pila ka semana nga ginhimo nila ini. Sa unang adlaw matapos ang reyde halos 24 oras ang bantay nila sa tsekpont sa Binalbagan kag Himamaylang. Ang mga ospital sa halos tanang nga mga kabanwahanang kag sentrong syudad ila ginmonitrong kag regular nga ginahalughog angot sa mga pilasong kuno nga NPA.

Sa karon desperado ang pagtinguha sang AFP kag PNP nga papasong ang NPA ilabi na nga nagalala ang krisis sa ekonomiya sa pungsod kag kalibutan. Masami gihapong nga ginahalitan nila amo ang masang mangunguma kag mamumugong sa uma sa tagas ka operasyong militar. Piho nga madasig ang paglabang sang listahan sang ila nga mga biktima sa pagsingki sang militarisasyong.

Ang Inaway sa Tacpao, Guihulngan

Antes ang May 10, 2004 nga eleksyong masako na ang 303rd Brigade PA sa ila preparasyong para sa duhang ka mayor nga rasones. Una, ipasiguro ang kadalag-an ni Macapagal-Arroyo sa eleksyong. Pangaduha, ang paglunsar sang lapnagong nga operasyong-militar antes o matapos ang eleksyong.

TARGET: mga larangan gerilya sang CPP-NPA sa sentral Negros.

Gindugang ang 12th IB PA para magserbe nga CAFGU handlers. Paagi sini mahilway ang 11th IB, 61st IB kag 66 IB para mangin mga *strike battalions*. Ginistasyong ang 2 ka helicopter sa Oriental Negros bilang pangkombat kag suporta.

Ginpaidalum sa *retraining* ang 11th IB kag 61st IB para sa COIN. Talalupangdong man ang paghanas-militar sang special CAFGU nga RPA-ABB para sa operasyong batuk sa CPP-NPA nga koordinado sa 303rd Brigade PA.

Sinemana matapos ang eleksyong kag napiho na ang madinaya-on nga kadalag-an sang iya commander-in-chief nga si Macapagal-Arroyo, gin-anunsyaring ni Brig. Gen. Sodusta sa media ang iya ala-Rambo nga pagpanghangkat sang inaway sa CPP-NPA.



Suno sa koresponsal sang Leonardo Panaligan Command-LG1, ginapaabot na nila ang daku nga operasyon militar. Gintumod niya ang lapnagon nga hublag protesta batuk sa pagpang-agaw sang duta nga ginamanipestar sa pagsulod sang Mosser Corp., pagmina ni Paras kag ang transpormasyon sang mga saop sa asyenda kag pastuhan bilang mga basehan sang militarisasyon. Kaangot sini mabaskog man nga ginapamatukan sang pumuluyo ang CAFGU *recruitment* kag pag-operar sang RSOT.

Sa pihak naman nga bahin tayuyon ang pagbaskog sang CPP-NPA. Nangin madinalag-on ang sunod-sunod sini nga taktikal nga opensiba kag punitibo nga aksyon sa nasambit nga larangan. Mantsa ini sa *military career* sang utok-pulbura nga si Brig. Sodusta nga nagsumpa nga indi matabo sa iya ang mga kapaslawan sang iya nga ginbuslan sadto nga si Brig. Gen. Alphonsus Cruzero.

Handum kag dumot niya nga wasakon ang Larangan Gerilya 1 sa pinakadasig nga pamaagi.

May inisyal nga natipon nga datos ang kaaway paagi sa ila gintanum nga BIN (Brgy Intelligence Network) angot sa sulod kag gwa sang suplay kag tawo sa Brgy. Tacpao, Negros Oriental. Isa ka rekonaysans platoon sg 11th IB PA ang iya ginpadala para kumpirmahon ang *intel report* nga ini. Ang nasambit nga platoon may mando man nga mag-inisyal sang atake kon makabonggo.

June 10-11 2004

Gab-I ang maniobra sang kaaway. Apang ining tiid nga paghulag namonitor na sang nagakampo nga NPA kag naka-alerto na ang tago nga mga *sentry posts*.

June 12, 2004. 4:45 sang kaagahon.

Wala makahibalo ang nagamani-obra nga yunit sang kaaway nga namutikan na sila sang sentry 1 sang NPA.

Nakahanda na kag naka-aiming ang ila nga armas sa nagaplanka sa wala kag tuo nga kaaway. Gulpi ini ginbanat sg M60 machinegun sang NPA kag insigida 3 ang patay kag madamo ang mga pilason sa bahin sang militar. Nakibot ang kaaway kag napaatras.

Sang nag-reimpors ang sentry 2 nga yunit sg NPA paagi sa pag-*outflank* sa kaaway, nabutang ang kaaway sa dependensya nga posisyon. Nagpilit ang mga pasista sa ila nahamtangan kag pulu-panahon sila naga-asolt. Wala napasa gilayon ang mga impormasyon para mabasa sang kumand sang NPA ang sitwasyon sang inaway kag para sa koordinasyon. Ini nga problema nagresulta sa indi nasustenir nga inisyatiba sang NPA nga papason ang nag-reyd nga platoon sang 11th IB.

Natapos ang bakbakanay sa takna 8:00 sang aga sang mag-atras ang katapusan nga iskwad sang NPA. Dugay na nga naka-*withdraw* ang kabilugan nga pwersa sang NPA antes mag-abot ang reimporsment sang militar sang alas 11:00. Dala ang ila suporta nga apat ka helikopter, gilayon nila nga ginkuha ang ila 8 ka patay kag 5-7 ka pilason nga tuyo nila itago.

Sa bahin sang NPA namartir si Ka Jet (Dominador "Junjun" Justiniani) matapos sang aktibo nga depensa kag maniobra batuk sa mas superyor nga tropa sang kaaway tubtub nga makaatras na ang kabilugan nga tropa sang Pulang hangaway.

Bangud sang kaswalidad sa bahin militar, naghuramentado si Brig. Gen. Sodusta kag nagmobilisa sang daku nga mga tropa gikan sa 11th IB, 61st IB, 3rd Scout Ranger Company, RMG Batalyon, 542 Eng'g Batalyon kag RPA agud sa paglagas sa mga pwersa sang NPA. Ila ginsaywar kag ginterorisa ang masa agud makakuha sang impormasyon apang napaslawan sila.

Pinili nga Banas...

Bilang paghanduraw sa mga Pulang Martir, ang AP nagdedikar sang sini nga seksyon angot sa pagbalik-tan-aw sa mapula nga banas nga ginbilin sang mga kaupod para aton padayunon tubtub sa kadalag-an.

Ka Tingson (Elpidio "Eping" Tranilla)



"Mabuhi pa ako sini..." mga tinaga ni Ka Tingson samtang nagadiliryong na sa hemoragya dulot sang shrapnels sang bala sa sulod sang iya ulo.

Enero, 2004 sang ang iya yunit (iskwad) naka-engkwentro sa mga katapu sang RPA-ABB sa norte nga bahin sg Negros. Naigo siya kag naparalisa gilayon samtang duha man ka katapu sang RPA ang napatay. Nadakpan ang duguon nga si Tingson kag gilayon gindala sang RPA sa kapulisan sang Cadiz sa baylo nga sa ospital kuntani. Sa ulihi gindala sa Cadiz Hospital apang bangud indi masarangan gindala sa Bacolod City. Ginparada siya sa Provincial Police Headquarters, Hall of Justice kag sa ulihi sa Provincial Jail.

Daku ang kaakig sang *Jail Warden* sang makita ang ka iresponsable sang kapulisan nga dal-on ang kritikal katama nga tawo (sige dugo ang ulo) sa prisohon kag indi sa ospital. Sang ara na sa Regional Hospital didto nadiskobrihan nga may srapnel gali sa ulo (rason sang internal kag *external bleeding*) kag dapat gilayon nga operahan.

Indi nangin madinalag-on ang operasyon. Masyado na kalala ang iya kundisyon sang siya gindala sa ospital. Napatay siya sa presensya sang iya pamilya kag pila ka kaupod.

Naghalin sa sahing mangunguma si Ka Tingson. Bangud sa iya nga kapisan napaiskwela niya sa Hayskul kag kolehiyo ang iya mga kauturan.

Sang soltero biktima siya sang pagpangastigo sang militar kag CAFGU. Napatay niya ang isa ka para-militar sang hana tani sini bun-on ang iya nakagapos nga utod. Dulot sini nagpalagyo siya sa Brgy. Prosperidad sa San Carlos City, nakapangasawa kag naka-anak sang 7 ka bilog.

Nangin katapu siya sang panatikong Pulahan para lamang mapangapinan ang kaugalingon. Nangin Tanod kag bangud maayo ang rekord ginsaligan siya sang Barangay.

Tuig 2000, ginsuspetsahan siya nga amo ang responsable sa pagpatay sa isa ka mangunguma sa Brgy. Bunga, Don Salvador Benedicto. Ginpangita siya sang RPA-ABB nga amo ang nagdala sang iya *Warrant of Arrest*. Nalagyo siya liwat kag nangita sang hustisya sa gobyerno sa kabukiran. Tuyo niya magdangup sa NPA para ipamatud-an ang iya pagka-inosente.

Sang 2001, isa ka yunit sang NPA sa San Carlos nga bahin ang naangutan sang iya pamilya tubtob siya ang naistorya. Inosente si Eping sa pagpanayasat sang mga kaupod sa iya kaso sa nasambit nga lugar. Ginbaton siya una para isafekeeping lang. Samtang ginasafekeep, aktibo si Ka Tingson sa pagbulig sa masa kag kaupod sa amo nga lugar. Ginhatagan siya sang mga pagtuon, gintudluan magbasa kag magsulat, gintasa kag sang ulihi nagkomit nga maglubos panahon nga katapu sang NPA.

Pebrero 2002, nagsumpa si Ka Tingson nga lubos panahon nga mag-alagad sa katawhan paagi sa pagpasulong sang armadong paghimakas, kabuhi man ang iya ihalad. Sugod sadto, nangin tayuyon ang iya paghikot bilang NPA. Una nga gintun-an niya ang pagsulat kag pagbasa para mas aktibo nga makapahangop, organisa kag magpahulag sa masa.

Kun mabudlay ang sitwasyon kag nagaproblema ang mga kaupod, permi siya mabatian nga nagasiling "Sige lang Ka! Unsaon man ni kay ingon ani gyud ang rebolusyon. Ato ra ni nga tabangan ah! Maningkamot lang ta sa ato'ng maabot. Ayaw gyud pagpaluya!"

Ka Gary (Efren "Ka Daryl" Sabio)

(Nakuha sa porsyon sang parangal-pahayag sang NPA)

Katorse anyos ang edad kag nasaksihan niya ang kapintas sang militar sang ginpaarakan ang ila balay, ginransak kag ginkuha ang ila mga kagamitan kag kasapatan. Nagtulo lamang ang iya



mga luha kag nagtan-aw na lamang nga wala sang may mahimo samtang nagapalayo na ang mga militar. Puno pa siya sang lunang sa pagtinguha nga makalikaw sa naga-ulan nga bala gikan sa pusil sang mga pasista. Nasaksihan man niya ang pag-istraping sa iya amay nga napilasan sa ulo apang nakaluwas.

Si Ka Gary ika-4 sa siyam ka mag-ulutod gikan sa nahanunga nga mangunguma. Mabuot, mapisan kag seryoso

kon magtrabaho. Bilang anak sang rebolusyonaryo nga pamilya, indi na mabudlay sa iya ang paghangup kag mag-akseptar sang armado nga paghimakas.

Isa ka natural nga lider, maayo makig-abyan kag wala naga-entra sa mga bisyo sa baryo si Ka Gary. Nag-untat siya sa pag-iskwela para matungdan ang produksyon sang pamilya kag mapaeskwela ang mga kauturan.

Tuig 1999, nagdesisyon si Ka Gary nga magpatapu sa BHB agud lubos panahon nga mag-alagad sa pumuluyong pigos kag ginahimuslan. May mataas nga disiplina, maayo makipagrelasyon sa masa kag kaupod, mapisan kag mataas ang ispiritu sang boluntarismo-ini ang mga nagapanguna niya nga kina-iya.

Wala siya sang pagpang-alang-alang sang gindeploy sa Sur sang Negros sang tuig 2000. Tungod sa madasig ang iya nga pag-uswag sa hilikuton, dasig man ang iya promosyon, halin sa *gunner*, nangin *assistant squad lider* kag nangin giya sa pulitika (GP). Naka-upod siya sa *opensibang aksyon* (TO) tulad sg ambus kag nangin madinalag-on, naka-upod man siya sa pagpang-reyd, *encounter* kag may ara man *dependisibang aksyon* nga kaaway pa ang nahalitan.

Nangin tayuyon ang pag-uswag ni Ka Gary, wala siya nagakatandog anuman nga problema ang masumalang personal man ukon organisasyunal, nangin inspirasyon niya ang kahustuhon sang linya sg DRB subong man ang malapad nga masa. Ang iya matam-is nga yuhom nagasimbolo sang iya busilak nga pagkatawo kag kalipay nga magrebolusyon.

Pebrero 15, 2004, isa siya sa namuno agud tigayunon ang isa ka reyd sa Mahalang Detachment. Kabahin siya sang Asolt tim kag personal nga naghawan sang mga *early warning devices* sang kaaway para wala gahod nga makasulod ang mga kaupod sa detachment. Sa nagsunod nga masinandukot nga masobra 4 ka oras nga inaway, naigo siya kag namartir.

Ka Jaypee (Jaime "Nono" Agrava)



Indi makita sa manaya-naya nga nawong kag permanente nga yuhom ang kurit sang kahapon nga gin-agihan ni Ka Japee, 46 ang edad. Nagsulod siya sa hublag sa temprano nga bahin sang dekada 80. Anak siya sang imol nga mangunguma gikan sa Dancalan, Ilog.

Nagdaku sa kapigaduhon, si Ka Japee o Ricky temprano pa nga nag-obra sa hacienda sang Lopez sa Ilog, sumugod sa pamugon sa kampo hasta nahimo siya nga drayber sa *trucking*. Suno sa iya pamilya, bisan sang bata pa si Nono o Boboy (palayaw ni Ka Japee) mabaskog na ang iya sini nga paghangup sang hustisya kag inhustisya sa katilingban. Suno sa iya mga suod nga abyan sang sila bata pa, masami siya makakita sang away bangud indi niya mabatas nga magpabaya lang kun may makita nga inhustisya.

Si Ka Japee isa sa madamo nga mga pamatan-on nga narekrut sa rebolusyonaryo nga hublag gikan sa iya lugar partikular sa Kilometrahe 110.

Sa una niya nga mga tinu-ig sa NPA, naka-upod siya sa nagkalain-lain nga porma sang TO nga kadam-an nangin madinalag-on. Isa diri ang commando reyde sa Scout Ranger Coy sa banwa sang Isabela. Sang gintukod ang Isparo Yunit sa Negros, si Ka Jaypee ang isa sa pinaka-una nga mga katapuan. Nangin kabahin siya sa pagserbe sang rebolusyonaryo nga hustisya sa mga nagapanguna nga mga despotiko nga agalon may duta kag berdugo militar.

Indi nagdugay kag si Ka Jaypee gindeploy sa Maynila para mangin katapu sang *special operatives* nga direkta sa pagpamuno sang General Command sang NPA. Subay sa lihis nga linya sang adbenturismong militar sang dekada 80, napaupod siya sa gangsterismo kaangay sa pagpang-*hold-up*, pagkidnap kag iban pa.

Naggamo ang utok niya bangud indi na niya mahangpan ang nagakatabo kag ginapahimo sa ila nga para sa iya- daku nga sayup. Apang nagapangibabaw sa iya ang idealismo, pyudal nga panglantawan kag sala nga konsepto sang "demokratiko-sentralismo" kay bangud kilala nga mga upisyal sang Partido kag NPA ang nagamando, gani ang mga ini husto.

"Masyado gid ka nabaw sang akon pang-ideolohiya nga pundasyon sadto nga panahon," nagayuhom apang seryoso nga hambal niya. "Laban bi sa inom kag pang-*chicks* ubra namon tapos operasyon mo, for the boys daw" prangka nga pag-ako niya.

Ang pag-upod ni Ricky sa gangsterismo naglala pa gid sang magsulod siya sa Red Scorpion Group. Gintukod ini sang anay mga kaupod nga nalulong sa kriminal nga mga aktibidades kaangay sang pagpang-*hold-up*. Diri man siya naangutan sang *Intelligence Service* sang AFP nga may direkta nga angot sa nasambit nga grupo.

"Kon may positibo gid man nga resulta ang paglihis sa linya sa akon, ina amo nga ako buhi nga ehemplo kag saksi sa mga kasal-anan nga ginhimo ni Tabara, Kintanar, Lagman kag dela Cruz. Bisan ako "ultimo" lang, nakita ko nga sayup na ang teorya kag praktis sang Partido kag NPA gani ako nanadlong. Sila nga ara sa "taas" nagpakatig-a kag nagsikway sang kahublagan panadlong. Ti karon diin sila? ...kundi ara na upod sa kaaway." mga panaad ni Ka Jaypee sang siya magbalik sa Negros para magbulig sa inisyal nga pagtinguha sang Partido sa isla nga mag-istorya sa mga katapu sang NPA nga ginyauban sang grupong Tabara.

Sa una nga peryod sang rektipikasyon sa Negros, naeksperyensyahan ni Ka Jaypee ang kabudlay sang banas sang pagpanadlong. Sa sulod sang Partido kag

Hukbo masami siya nangin kabalyero sa "espadahay sang mga ideya" kon paano solbaron ang simple kag komplikado nga mga problema, paghimo sang importante nga mga plano kag desisyon, kag pagpatuman sang mga responsibilidad kag katungdanan.

"Marekut kag magansal sa pihak nga bahin maalwan kag maayo magpakadlaw,"ini ang masami nga komentaryo sang mga kaupod kay Ka Jaypee.

"Indi na siya mag-untat duso sang iya mga pamangkot, suhestyon kag mga analisis tubtub indi siya resolbado." Ini ang tatak ni Ka Jaypee.

"Naagihan ko na nga maghipos sa panahon sang lihis, kag indi maayo ang resulta sa akon kag sa Partido, dapat lang nga mangin baid permi sa banggianay sa ideya, kay diri lang magtalum ang aton rebolusyonaryong teorya sandig sa praktika," paathag ni Ka Jaypee.

Nadeploy si Ka Jaypee sa madamo nga mga rebolusyonaryo nga hilikuton halin sa pagtukod sang larangan, ispesyal nga trabaho sa Hukbo kag iban pa. Nangin matunog ang iya ngalan sa kaaway kag halos mga mayor nga opensiba sang NPA gina-angot sa iya.

Pebrero 15, 2004. Kabahin siya sang asolt tim sang NPA sa pag-reyde sa Mahalang Detachment. Naigo siya sa inisyal nga pagdebelopar sang inaway. Sa pihak sang bulong nga gindapat sang medik sang Hukbo, nabugtu-an sang kabuhi si Ka Jaypee.

Ka Jet (Dominador "Junjun" Justiniani III)

"Gikan sa sahing agalon may duta, gintalikdan niya ang masulhay nga pangabuhì para mag-usoy sa pinili nga mabudlay nga banas sg rebolusyon kag nangin hangaway sg katawhan para mag-alagad sa masang pigos kag ginahimuslan."

Si Dominador Justiniani III, ukon Junjun (alyas Ka Jet), 27 ang edad, may asawa kag may isa ka bata. Anak siya sg isa ka agalon may duta sa Calatrava. Si Ka Jet

nagdaku nga masulhay ang pangabuhi. Malapit ang balatyagon niya sa ila mga tinawo. Nagapangabuhi siya upod sa ila mga tinawo- diri nagatulog, nagakaon kag may maayo nga kina-iya gani palangga siya sg ila mga tinawo.

Gamay pa siya nailo na sa amay bangud ginpatay sang mga Lawsa brothers. Ini nga panghitabo nagtulod sa iya nga mamensar sa pagtimalos. Nagtulod man ini sa iya nga iloy kag mga utod nga magsaylo sa Manila kag didto na mangabuhi. Apang si Ka Jet nagpabilin sa ila duta sa Calatrava kag diri nangabuhi upod sa ila mga tinawo samtang nagapadayon man sa pag-iskwela.

Nagkuha siya sg kurso nga *Aeronautics* sg *college* didto sa Manila apang wala siya nakapadayon bangud sa pagpangibabaw sang personal nga handum nga magtimalos sa mga nagpatay sa iya amay. Nagpauli siya sa ila lugar sa Calatrava agud magpakig-angot sa NPA apang wala siya sg may naangutan.

Sa kinaiya niya nga makatarunganon kag nagapanindugan sa husto kag moral, isa siya nga may mabaskog nga tindog batuk sa droga. Nangin aktibo siya nga asset sg CIDG para sugpuon ang droga. Madamo ang iya naporma nga *asset/network* sa *anti-drugs*. Ang ini nga mga networks nangin suod sa iya kag naporma niya bilang armed groups para sa *anti-drugs*.

Suno sa iya, madamo siya sg ginhatag nga datos sa mga militar kag otoridad bahin sa mga target nga reydon nga mga *local druglords* apang sa taga ka pag-reyd indi madakpan kay gulpe lang nagabag-o ang patern sg paghulag sg mga target. Diri siya amat-amat nagduda nga ang *drug syndicates* kag *military officials* may mga *connections*. Namensar siya nga indi na maghatag sang datos. Kabaylo sini, nagplano siya kg iya nga grupo para mapamatud-an ang ila nga mga duda. Gani isa ka operation ang ila nga ginhimo

kag nadakpan gid ang daku nga bolyum sang marijuanan kag ila ginsunog. Diri siya nag-*conclude* nga may kaangtanan gid ang sindikato sa druga kag mga opisyaes militar. Isa man ini sang mga sirkumstansya nga nadula na gid ang iya nga pagsalig sa militar magluwas sa pila nga ara dira nga sinsero sa serbisyo kag indi *corrupt* kag sindikato.

Diri siya nagpursigi nga makig-angot sa NPA. Sa pila ka sirkumstansya, nakaabot siya sa lain nga rehiyon kag didto nagsugod sa pagka-aktibo. Nagtungod siya sg trabaho sa masobra 2 ka tuig kag nag-*propose* nga magsaylo sa Negros bangud sang iya sentimeyento nga makabulig diri. Naaprobahan ini nga proposal kag nasaylo siya sa Negros.

Nakasulod siya sa NPA sa Negros sg Agosto 2003. Sugod diri aktibo kag mapagsik siya nga nagtungod sang mga hilikuton. May kakahas, kaisog kag may pagka-agresibo kag madamo siya sg *skills* sa lain-lain nga patag nga mapuslanon para sa rebolusyon.

Maukod siya magtuon sa teorya kag may pagkatalum sa pag-analisa. Maayo man ang iya nga praktika gani wala siya sang pag-alang-alang nga nangin katapu sang Partido Komunista sg Pilipinas, bagay nga iya gid ginapabugal.

Bangud sg maayo nga teoritikal nga pundasyon, nabag-o ang iya panan-awan nga indi na mangibabaw ang personal nga dumot bilang iya kawsa sa pagsulod sa NPA kundi ang makasahi nga pag-alagad sa malapad nga masa. Ang iya dumot sa pamilya Lawsa nagbag-o. Narealisar niya nga sila biktima sg sirkumstansya sg dunot nga sosyedad kag ang pagpatay indi amo ang solusyon kundi ang pagbag-o sg sistema. May pagpasunaid man siya sa mahimo nga batyagon sg pamilya pareho sang ila ginbatyag nga kasubo sadto sa pagkapatay sang ila amay kag ang kabataan kag iban nga pamilya Lawsa

inosente man sa nagkalatabo. Diri nangibabaw ang iya nga pagkamaluluy-on.

Bangud sg sini nga mga realisasyon gunbuhos ni Ka Jet ang dedikasyon sa pagpatuman sg hilikuton kag misyon bilang NPA kag katapu sg Partido. Sa madamo nga mga rebolusyonaryo nga kadalag-an sg yunit nga iya ginapatapuan, may daku nga papel diri si Ka Jet.



Si Ka Jet, isa ka mabu-ot kag maayo nga opisyal. Wala sang pagpangduha-duha sa pagpatuman sg misyon. Disiplinado, indi makinaugalingon (*selfless*), maayo makigrelasyon sa kaupod kag masa, madinumdumon, kag may permi nga pagkabalaka sa kaayuhan sg masa.

Si Ka Jet napatay sa isa ka reydon nga ginlunsar sang daku kag preparado nga pwera sg kaaway batuk sa *fullsize squad* sg NPA nga nagagwardiya sang Hunyo 12, 2004 sa bahin sang Brgy. Tacpao, Guihulngan.

Si Ka Jet napatay sa pagdepensa sa Partido kag Hukbo kag ang iya pagtaliwan nagpreserba sang madamo nga kabuhi.

“Ang kabudlayan, problema, sakripisyo kag kamatayon indi malikawan nga bahin o parte sang rebolusyon. Ang pag-atubang sa mga ini nga wala sang pagkalingkang kag pagpang-alang-alang ang husto nga panindugan sang isa ka komunista.”

303rd Brigade PA - Hari sang Terorismo sa kaumahan, ginakondenar sang pumuluyo



"Labi ang mga pag-antus namon nga mga mangunguma nga nagapuyo sa mga barangay nga nasakop sang malapad kag mabaskog nga mga operasyon militar sg mga tropa sang 303rd Bde Phil. Army, RMG, PMG kag RPA."

Ini ang pahayag sang mga nabiktima, naperwisyo kag apektado

nga pumuluyo sa lapnagon kag sige-sige nga operasyon militar sa daku nga handum ni General Sodusta nga mapusa ang mga target nga larangan gerilya sang NPA.

Suno pa sa pahayag sang tigpamaba sang gintukod nga pederasyon sang mga mangunguma nga ang operasyon militar nagsugod pagkatapos sang Mayo 10 nga eleksyon kag nagbaskog pagkaligad sang Hunyo 12 nga engkwento sa tunga sang Phil. Army kag NPA sa Brgy. Tacpao, Guihulngan.

"Ang pagtenir sg militar sa amon lugar, ang ila paghulag sa adlaw kag gab-i nagatuga sa amon sg mga problema. Ila ginatublag ang amon kalinong, ila nasablagan ang hilway nga paghulag kag pagpatigayon sg produksyon kag pila sa amon nangin biktima na sg ila kabangis.

Ila kami ginpahog, gina-interogar, gina-kastigo, ginapalibutan kag gulpi lang sila mag-sulod sa balay kag lantawon ang amon mga gamit. Ila kami pasibangdan nga masa ukon myembro sang NPA. Ila ginkuha ang amon mga manok nga wala bayad para ila ihawon.

Ang mga operasyon militar sa kabukiran dugang lamang nga pag-antus para sa amon nga mga mangunguma nga naga-antus sa daku nga gutom.

Permi hapdi ang amon nga tiyan bangud sa kagutom. Wala kami sg duta ukon kulang o pigaw ang duta kag kon may ara man pila ka lang ka puna. Taas ang presyo sg mga balaklon apang barato ang amon ginabaligya nga produkto. Manubo man ang suhol kon kami magpamugon. Ang 1 ka gantang nga bugas magbili tubtub P50.00. Kalabanan sa amon bisol kag kamote-kahey na ang gina-kaon. Ang amon pamatan-on ato na sa Cebu, Bacolod o Manila sa pagpangita sg obra. Madamo na ang wala makapauli kay ang ila sweldo kulang pa sa plete."

Ginsaad man sa pahayag nga ang sa likod sini nga militarisasyon amo ang pagpang-agaw sang kadutaan sang mangunguma sa ngalan sang eko-turismo, *reforestation*, pagmina kag iban pa nga padihot sang reaksyonaryong gobyerno. Si Charles Mosser naga-claim na sang malapad nga *forested areas*

sa Central Negros. Si Oscar Montilla nagtuyo nga himuon nga *eco-tourism complex* ang Bactolon Sipalay. Ginplano ang pagmina sa malapad nga kadutaan sa Sipalay kag Hinobaan.

"Wala sang natabu nga matuod nga reporma sa duta. Ang kamatuoran nagalala lamang ang rekonsentrasyon sang mga duta sa pila lang ka agalon mayduta tulad sg pamilya Arroyo kag Cojuangco.

Kon ang iban nga utod namon nga mangunguma nag-entra sa armadong paghimakas sang NPA, ina bangud nakita nila nga armadong paghimakas amo na lang ang nabilin nga solusyon sa ila mga problema sg kawala sa duta kag sg grabe nga gutom," dugang nga paathag sang pahayag.

Bangud sa kabug-aton kag kalala sang sini nga sitwasyon nga ginaatubang sang mga pumuluyo sila nagapanawagan nga "...dapat na tamdon sang gobyerno ang madugay na namon mga demanda sa pagsolbar sg gutom kag kauhaw sa hustisya. Ini amo ang masunod:

1. Subsidyo sg pagkaon kag kagamitan sa produksyon ang gilayon ihatag sang gobyerno kag indi militarisasyon sa kabukiran.
2. Ipatuman sg 303rd Bde Phil. Army ang CARHRIHL.
3. Bayaran ang ginhalitan nga mga biktima sg operasyon militar.
4. Ipatuman ang matuod nga reporma sa duta."



Mga titser nagprotesta batuk sa harasment

Pagkatapos sang tagsa ka reaksyonaryo nga eleksyon masami nga tapalan sang mga nagkalapierdi nga politiko ang mga manunudlo. Akusado sila sa pagpangdaya, pagpaggamit sa mga politiko kag halos tanan na nga lunang sang mahigko nga piniliay ihaboy sa ila.

Indi na matulon ang ining mga akusasyon kag sa ila kolektibo nga pag-isa sa pagdependa sa mga ginaalegar nagdinaya nga mga titser, masobra 3000 ka manunudlo ang nagmartsa sa

dalanon sang Bacolod sang Mayo 2004. Ila nga ginpakamalaot ang mga atake ni Mayor Joy Valdez batuk sa ila organisasyon kag nagpanawagan nga mangayo ang alkalde sang pasensya.

Angot man sini, ang KAGUMA (Katipunan ng Gurong Makabayan), isa ka rebolusyonaryo nga organisasyon sang mga titser nagpahayag nga ang pungsodnon demokratikong rebolusyon lamang sa porma sang armado nga paghimakas ang makabag-o sa kalalaon sang

sitwasyon sang sektor sang manunudlo kag tanan nga pumuluyong pigos.

"Ang ila aksyon protesta nagmanipestar man nga wala gid sang pulos ang reaksyonaryo nga eleksyon kay ini nagaserbe lamang sa mga nagapapili nga mga nagahari nga sahing dalagku nga komprador-agalon-may-duta kag mga burukta kapitalista nga puro man mga dayaan," suno sa pahayag sang KAGUMA.

Bridge Program para sa hayskul ginkondenar

Sa tuyo sang Departamento sang Edukasyon (DepEd) nga mangin maalam kuno ang mga hayskul nga istudyante nangin alampuan sa perwisyo ang ila 5 year Bridge Program. Sa idalum sang sining programa ang mga gradweyt sa elementarya magagakuha sang isa ka national entrance exam antes makasulod sa hayskul. Ang indi pasado magatenir pa sang dugang nga isa ka tuig sa hayskul.

Wala pa matigayon ang *national exam*, ginbana-bana na sang DepEd nga masobra 60% porsyento ang indi makapasar. Makalikaw lamang sa 5 ka

tuig nga hayskul kon mag-enroll sa pribado nga iskwelahan.

Ginkondenar ang ini nga program sang Movement for Quality Education (MQC), isa ka alyansa sang mga ginakanan, mga maestra kag istudyante sa Negros Occidental. Ginpahayag sang MQC nga ang programa magapalala pa gid sa ila pigado nga sitwasyon kag tayuyon nga pagpabaya sang gobyerno sa edukasyon kag pagtugyan na lamang sa mga pribado nga mga kapitalistang edukador.

Bangud sang mabaskog nga protesta gikan sa ginikanan, istudyante pati na

mga manunudlo, temporaryo nga ginsuspender anay ang programa sang DepEd.



Mga Drayber kag Pumuluyo nagpamatuk sa indi-tawhanon nga Pletehan sang LTFRB

Wala pa ang inugurasyon ni Pres. Macapagal-Arroyo, gulpi nga nagtimbuok ang pletehan nga nagresulta sa lapnagon nga pagpamatuk sang pumuluyo. Halos 100 porsyento ang saka sang pletehan resulta sang korap kag kontra-pumuluyo nga LTFRB (Land Transportation, Franchising and Regulatory Board).

Sa pagpanguna sang UNDOC, BAYAN kag Bayan Muna, ang serye sang protesta nagtulod sa LTFRB Chairperson Elena Bautista nga magkari sa Bacolod City para atubangon ang yamo kag reklamo sang pumuluyo nga nagapanawagan man sang iya gilayon nga pagresayn. Ipit sa pader, ginmandu ni Bautista ang temporaryo nga pagbalik sa daan nga pletehan samtang wala pa madesideran ang pinal nga taripa.

Mabaskog nga gindemanda sang mga drayber, operators kag iban pa nga sektor ang gilayon nga pagbasura sang Oil Deregulation Law nga ugat sang wala na kontrol nga pagpasaka sang mga *oil cartels* sang presyo sang produktong langis. Daku ang benepisyong reaksyonaryong gobyerno sa sining kontra pumuluyo nga layi bangud lapit sa tunga sang presyo sang langis nagakadto sa buwis.

11th IB PA nagterorisa sang mga kabataan

Liwat nga nagsabwag sang terorismo ang 11th IB PA sa mga pumuluyo sang Brgy Maniac, Guihulngan, Negros Oriental sang Mayo 7 - 27, 2004.

Sang Mayo 7, isa ka katapu sang 11th IB ang nanumbag sa isa ka mangunguma matapos mapierdi sa sugal. Ginsing-alan man sang pila ka katapu sang nasambit nga batalyon ang mga pumuluyo matapos makakas ang bilbord sang "Balik Baril Program" sang 303rd Brigade PA sa lugar.

May 17, nagtulog ang militar sa iskwelahan. Nangawat ang mga ini sg utanon sa garden sang kabataan sa may iskwelahan. Wala pa nakontento sa pagpangawat, ila pa ginpamus-unan ang garden nga nagresulta sa indi na mapalapitan sg mga pumuluyo

bangud sa tuman ka baho. Sa idalum ini ni Lt. Sumbiling.

May 18. 24 ka tropa ni Lt Sumbiling halin sa C Coy 11th IB PA, pwersado nga nagsulod sa Mountain Clinic, isa ka pribado nga Klinika sa Kalabaklabakan, sa diin may *cultural* treyning ang mga pamatan-on. Namangkot ang mga ini kon may mga pilason nga NPA apang nanginwala ang *caretaker*. Hinambalan sila nga kon may Army o NPA gid man nga pilason, ila ini buligan. Ginhingyo sila sang *caretaker* nga maghalin bangud ginakulbaan ang mga nagatreyning nga mga kabataan. Ila man ginpaondo kag ginrikisa ang 5 ka pamatan-on nga maupod sa *cultural training* sa *clinic* kag gin-imbistigar angot sa mga armado sa sulod sang baryo. Wala sg may matudlo ang mga

pamatan-on. Ila ginpaandaman ang mga ini.

May 18, pagpangayo sa pumuluyo sg mga lulutuon kag kon indi matagaan, nagakadula lang ang mga kasapatan sg pumuluyo. May 27, Gintiid ang pila ka panimalay, nagpakilala ang militar nga mga soldado sg MAKIBAKA.

Gintigayon man sang pumuluyo sang nasambit nga lugar ang pamulung-pulong batuk sa mga *military operation*. Gintumod nila ang indi paggamit sang mga *namecloth* sang mga operatiba sang militar, pagkadula sang ila kasapatan kon may *military operation* kag iban pa nga dagway sang terorismo sang estado nga ginatigayon sang pasistang militar.

Nagapangilkil nga RPA-ABB, gindakup sang NPA

Duha ka katapu sang RPA-ABB ang gindakup sang isa ka yunit sang Jean Pelle Command. Nakilala and duha nga sanday Rizalino Flores, 20 ang edad kag upod niya nga si Richan Roldan. Pareho mga residente sang Brgy. Guimbalaon, Silay City. Ara sa akto nga nagapanukot sang ila *extortion fees* sa pila ka mga enkargado sang mga asyenda, sakay sa isa ka motorsiklo sang madakpan sang Pulang hangaway. Nakuha sa ila nga posesyon ang isa ka pusil kag kwarta gikan sa ekstorsyon. Gilayon sila gindala sa "*holding area*" sang mga Pulang hangaway.

Suno sa yunit sang NPA, ang mersenaryong RPA nagapagamit sa mga despotiko nga mga asyendero sa pagpahug kag pagtapna sang mga nagareklamo nga mga obrero sa ila asyenda. Ini nga bagay ginkonfirmar man ni Rizalino pati na ang ila koordinasyon sa Phil. Army kag PNP.

Nagsumpa ang duha nga indi na magbalik sa RPA kag malakat na lang sa iban nga lugar para makapalagyo sa kontra-rebolusyonaryo nga grupo. Ginbuy-an sila maligaran sang pila ka adlaw.

... samtang padayon ang kalakasan sang RPA

May 6, 2004. Brgy. Estado, Victorias City. Pinaarakan sang luthang sang mga katapu sang RPA-ABB sa idalum sa pagpamuno ni alyas Kenneth ang isa ka balay bangud kuno sang presensya sang NPA.

Matapos matadtad sang bala ang puluy-an ila ginpilit nga patuaron ang tagbalay nga may NPA gid. Apang ini mabaskog nga ginpanginwala. Ila ginpang-ukay ang kagamitan sang tagbalay nga wala gid gani sang pagpahanugot sang tag-iya. Gin-interogar, ginpahog kag pilit ginapaako nga NPA ang isa ka pamatan-on nga halin sa Sentro sang Syudad sang Victorias, bisan pa ini ang namisita lang sa iya pakaisa nga bag-o abot halin sa Manila. Ila gid ginpilit nga isa sa nagapuyo sa amo nga balay ang katapu sang NPA bangud sang ila nakit-an nga isa ka pares sang Combat Shoes, bisan pa sang pag-angkon sang tagbalay nga iya sang iya anak nga ginagamit sa CAT.

Ang mga biktima gilayon nga nagdangop sa ila Brgy. Kapitan. Gilayon man nagpangayo sang bulig sa KARAPATAN-Negros kag nagbuyagyag sang ini nga kalakasan sang RPA-ABB paagi sa pagdangop sa media.

Bangud sini nga pagbuyagyag, pilit man ginapagwa sang RPA-ABB nga enkwentro sa tunga nila kag sang NPA ang natabo nga linupok malapit sa balay sang biktima.